



## IKINYAMAKURU K'IMIHINDAGURIKIRE Y'IKIRERE N° 21, KIGENEWE

### ABAHINZI- BOROZI IGICE CYA GATATU NYAKANGA (21-31), 2020

Cyasohotse ku itariki ya 02 Kanama 2020

#### Iriburiro

Mu minsi icumi y'igice cya gatatu, Nyakanga 2020 kuva tariki ya 21 kugeza tariki ya 31, ku bupimiro bwo ku Kibuga cy'indege cya Musanze, Gicumbi ndetse na Nyagatare niho haguye imvura nyinshi kurusha isanzwe ihagwa mu gihe cy'imyaka myinshi naho ahandi hasigaye mu gihugu haguye imvura nke. Ahaguye imvura nyinshi ni ku bupimiro bwa Musanze hapimwe milimetero 15.2.

Ibipimo by'ubushyuhe ni nk'ibisanzwe mu gice cya gatatu cya Nyakanga, igipimo cy'ubushyuhe bwo hejuru cyari hagati ya dogere Selisiyusi ( $^{\circ}\text{C}$ ) 20.1 muri Musanze ndetse na  $30.8^{\circ}\text{C}$  muri Rusizi ku bupimiro bwa Bugarama naho igipimo cy'ubushyuhe bwo hasi cyari hagati ya  $11.4^{\circ}\text{C}$  muri Musanze ku bupimiro bwa Busogo na  $17.6^{\circ}\text{C}$  ku bupimiro bwo mu muji wa Kigali.



**Ishusho 1:** Imvura yaguye ugereranyije n'isanzwe igwa muri iyo minsi.

## 1.0. Imvura yaguye

Aha turerekana ingano y'imvura yaguye, umubare w'iminsi imvura yaguye n'ubuhere bw'ubutaka mu minsi icumi y'igice cya gatatu cya Nyakanga 2020.

### 1.1. Ingano y'imvura yaguye

Ikarita ya mbere hasi irerekana ingano y'imvura yaguye mu minsi icumi y'igice cya gatatu cya Nyakanga 2020. Igiteranyo cy'imvura mu minsi icumi y'igice cya gatatu cyari hagati ya milimetero 0 na milimetero 15.2. Ku bupimiro bwo ku kibuga cy'indege cya Musanze, Busogo no ku bupimiro bwo Gicumbi niho haguye imvura nyinshi kurusha ahandi hasigaye. Imvura yapimwe ikaba yaranganaga na milimetero 15.2 ku bupimiro bwo ku kibuga cy'indege cya Musanze mu karere ka Musanze, milimetero 11.8 zapimwe ku bupimiro bwa Busogo na milimetero 6.4 zapimwe ku bupimiro bwa Gicumbi.



**Ikarita ya 1: Ingano y'Imvura yaguye mugice cya gatatu cya Nyakanga 2020 muri mm**

## 1.2 Imvura isanzwe igwa mu minsi icumi y'igice cya gatatu cya Nyakanga

Ufatiye ku bipimo by'igihe kirekire, ikarita ya kabiri iratwerekana imvura isanzwe igwa mu minsi icumi y'igice cya gatatu cya Nyakanga. Ubusanzwe igice cya gatatu cya Nyakanga kigusha imvura iri hagati ya milimetero 0 na 19.2; bigaragara ko ugereranyije n'imvura yaguye n'isanzwe igwa mu gihe kirekire, imvura yaguye yari nyinshi ku bupimiro bwo ku kibuga cy'indege cya Musanze, Gicumbina Nyagatare; ahandi haguye imvura nke cyane ndetse ahenshi ntiyaguye ariko bikaba ari ibisanzwe muri iki gice cya gatatu cya Nyakanga.



**Ikarita ya 2: Imvura isanzwe igwa mu gice cya gatatu cy'ukwezi kwa Nyakanga**

## 1.3. Umubare w'iminsi imvura yaguyemo

Ikarita ya 3 iragaragaza umubare w'iminsi imvura yaguyemo, mu gice cya gatatu mu kwezi kwa Nyakanga 2020. Umunsi tubara ko wagushije imvura ni uwapimweho byibuze milimetero 0.85 cyangwa nyinshi. Muri iki gice umunsi umwe wabonetse ku bupimiro bwa Nyamagabe, Rusizi, Ngoma na Nyagatare naho iminsi ibiri yabonetse ku bupimiro bwa Busogo. Iminsi itatu yabonetse ku bupimiro bwo ku kibuga cy'indege cya Musanze naho ahandi hasigaye nta mvura yahabonetse.



**Ikarita ya 3: Umubare w'iminsi imvura yaguyemo**

#### 1.4 Ubuhehere bw'Ubutaka

Aha turagaragaza muri rusange uko ubuhehere bw'ubutaka bwari bumenze. Ahenshi mu gihugu ubuhehere bw'ubutaka muri iyi minsi icumi y'igice cya gatatu cya Nyakanga 2020 bwaragabanutse cyane bitewe n'ibihe by'izuba byaranze iyi minsi. Hateganyijwe ko ubuhehere bw'ubutaka buziyongera mu gice cya mbere cya Kanama bitewe n'uko ibi bihe by'izuba bizatangira kugabanuka.


#### 2.0. Ibipimo by'ubushyuhe

Aha turareba muri rusange uko ibipimo by'ubushyuhe bwo hejuru no hasi hirya no hino mu gihugu byari bimeze.

#### 2.1 Igipimo cy'ubushyuhe bwo hejuru

Ikarita ya 4 irerekana ubushyuhe bwo hejuru. Ugendeye ku bipimo by'ubushyuhe dusanzwe dupima, ahenshi mu gihugu ubushyuhe bwari mu kigereranyo cy'impuzandengo y'igihe kirekire; mu Ntara y'Iburasirazuba, mu Mujyi wa Kigali, ndetse n'igice kinini cy'Iburengerazuba cyane cyane mu Majyepfo yaho niho hashyushye kurusha ahandi.


Mu Ntara y'Amajyaruguru akaba ariho hakonje ugereranyije n'ahandi mu gihugu. Ibipimo by'ubushyuhe byari hagati ya dogere Selisiyusi 20.1 na 27.8 ahenshi mu gihugu; uretse ku bupimiro bwa Bugarama hashyushye cyane hapimwe dogere selisiyusi 30.8.



**Ikarita ya 4: Ubushyuhe bwo hejuru**

#### 2.2. Igipimo cy'ubushyuhe bwo hasi

Ikarita ya gatanu irerekana uko ubushyuhe bwo hasi bwanganaga. Ubushyuhe bwo hasi bwari hagati ya Dogere Selisiyusi 11.4°C (Busogo) na Dogere Selisiyusi 17.6°C (Umujyi wa Kigali). Mu Majyaruguru y' u Rwanda niho hakonje cyane kurusha utundi duce tw'igihugu.




**Ikarita ya 5: Ubushyuhe bwo hasi**

### 3.0 Iteganyagihe rigenewe abahinzi mu minsi icumi y'igice cya mbere cya Kanama (tariki 01-10) 2020

#### 3.1 Ikirere giteganyijwe

Mu gice cya mbere cy'ukwezi kwa Kanama 2020 (hagati y'italiki ya 1 niya 10) mu Rwanda hateganyijwe kugwa imvura iri hagati ya milimetero 0 na milimetero 20. Mu misozi y'ibirunga iherereye mu turere twa Rubavu, Nyabihu, Musanze na Burera hamwe n'igice cy'amajyaruguru y'Akarere ka Nyagatare n'igice cy'amajyepfo y'Akarere ka Nyaruguru hateganyijwe imvura iri hagati ya milimetero 10 na milimetero 20. Igice kinini cy'Intara y'Iburengerazuba, inkengero z'ishyamba rya Nyungwe mu turere twa Nyamagabe na Nyaruguru n'ahasigaye mu turere twa Musanze, Burera na Nyagatare hateganyijwe imvura iri hagati ya milimetero 5 na 10. Ahasigaye hose hateganyijwe imvura iri minsi ya milimetero 5 ariko amajyepfo y'intara y'Iburasirazuba, igice kinini cy'intara y'Amajyepfo n'umujyi wa Kigali hateganyijwe imvura iri minsi ya milimetero imwe.

Imvura iteganyijwe kugwa mu mpera z'iyi minsi icumi kandi izaboneka mu minsi itarenze ibiri henshi mu gihugu. Imvura iteganyijwe mu gice cya mbere cya Kanama 2020 iri ku kigero cy'impuzandengo y'imvura isanzwe igwa muri icyo gihe mu gihugu hose.



**Ikarita ya 6: Iteganyagihe ry'imvura mu gice cya mbere cya Kanama 2020.**

#### 3.2 Ibirebana n'imirimu y'ubuhinzi

Dushingiye ku bipimo bigaragaza ko imvura irimo gucika ndetse ikazagabanuka cyane mu gice cya gatatu cya Nyakanga 2020 (tariki 21-31), abahinzi barashishikarizwa gukomeza gukurikiranira hafi ibihingwa ndetse bakaba banahinga cyane cyane mu bishanga n'ahandi hantu kuvomera bizaborohera, kandi bakomeza kugisha inama abashinzwe ubuhinzi babegereye. Barashishikarizwa kandi kujya basura urubuga rwa Meteo Rwanda [www.meteorwanda.gov.rw](http://www.meteorwanda.gov.rw), cg guhamagara umurongo utishyurwa 6080.